

共同經課 - 1 撒母耳記上十七章三十二節~四十九節

32 大衛 kā 掃羅講，人 m̄免為 tiòh hit 人來失膽，你 ê 奴僕 beh 去 kap hit-ê 腓利士人交戰。33 掃羅對大衛講，你 boē 能去抵敵 chit-ê 腓利士人，kap 伊交戰；因為你 ê 年歲 iáu-kú 少，伊 tùi 少年就學習戰士。34 大衛 kā 掃羅講，你 ê 奴僕 kā 老父顧羊 ê 時，有獅 á 是熊來，tùi 羊群中咬羊 á 去；35 我就 jip 伊，phah 伊，救羊 á 出伊 ê 嘴；伊起來 beh kāng 我，我就 khiú 伊 ê 嘴下斗，phah 死伊。36 你 ê 奴僕 bat phah 死獅 kap 熊；chit-ê 無受割禮 ê 腓利士人，也 beh 親像 in ê 一隻；因為伊藐視永活上帝 ê 軍隊。37 大衛 koh 講，耶和華救我脫離獅 ê 爪 kap 熊 ê 爪，伊也 beh 救我脫離 chit-ê 腓利士人 ê 手。掃羅 kā 大衛講，你去 ah，耶和華 beh kap 你 tī-teh。38 掃羅就用伊 ê 軍服 hō 大衛穿，用銅 ê 頭盔 hō 伊戴，koh hō 伊穿戰甲。39 大衛用刀 hā tī 軍服，試行看 cheh(=一下)；因為 m̄-bat 穿 tiòh。大衛 kā 掃羅講，穿 chiah-ê 我行 boē 去，因為 m̄-bat 穿 tiòh。40 大衛就 thng 起來；伊手 kiáh 拐 á，koh tī 山坑 á 揀五塊光滑 ê 石卵，hē tī 袋 á，就是顧羊 ê 人所帶 ê 囊；手 thèh hiⁿ 石 ê 索 á；就行 oá hit-ê 腓利士人。41 Hit-ê 腓利士人也 ná 行 oá 大衛，koāⁿ 牌 ê 行 tī 伊 ê 頭前。42 Hit-ê 腓利士人 kiáh 起來看，看見大衛，就看輕伊；因為伊少歲，色緻赤，面貌好看。43 Hit-ê 腓利士人 kā 大衛講，我 kiám 是狗 mah，你 chiah kiáh 拐 á 來我 chia？腓利士人就 kí 家己 ê 上帝，咒詛大衛。44 Hit-ê 腓利士人 koh kā 大衛講，你來我 chia，我 beh 用你 ê 肉 hō 空中 ê 飛鳥 kap 田野 ê 野獸。45 大衛對 hit-ê 腓利士人講，你來 oá 近我，是用刀，用鎗，用擲；我來 oá 近你，是用萬軍耶和華 ê 名，以色列軍隊 ê 上帝，就是你所藐視 ê。46 今 á 日耶和華 beh 將你交 tī 我 ê 手，我 beh phah 死你，thài 你 ê 頭殼；今 á 日我 beh 將腓利士軍兵 ê 身屍，hō 空中 ê 飛鳥，地上 ê 野獸；hō 普天下 ê 人 lóng 知以色列有上帝；47 koh hō chiah-ê kui 群 ê 人知耶和華救人，m̄ 是用刀，也 m̄ 是用鎗；因為交戰 ê 事在 tī 耶和華，伊 beh 將 lín 交 tī 阮 ê 手。48 Hit-ê 腓利士人起來，進前近 oá beh chih 大衛。大衛也趕緊走去，ng 軍隊 beh chih 腓利士人。49 大衛伸手入袋 á 內，thèh 一塊石 á 出來，用索 hiⁿ 去，射 tiòh 腓利士人 ê 頭額，石 á 沉入頭額；伊就倒落去，面仆 tī 地裡。

共同經課 - 2 詩篇九篇九節~二十節

9 耶和華 koh beh 做受壓迫 ê 人 ê 高台，Tī 患難 ê 時 ê 高台。10 Bat 你 ê 名 ê 人 beh oá 靠你；因為，耶和華，你 bē-bat 棄 sak chhē 你 ê 人。11 Tiòh o-ló khiā 起錫安 ê 耶和華，將伊所行 ê 報揚 tī 眾百姓 ê 中間。12 因為 hit-ê 查辦命案 ê 記得 in；無 boē 記得困苦人 ê 哀求。13 耶和華 ah，求你憐憫我；你是 tùi 死門救我起來 ê，Tiòh 鑑察 hiah-ê 怨恨我 ê 人所 hō 我 tú-tiòh ê 苦難。14 Thang hō 我講起你一切 ê 好名聲；我 beh tī 錫安城 ê 門，為 tiòh 你 ê 救恩來歡喜。15 列邦陷落 tī in 所開 ê 陷坑；In ê 腳纏 tī in 暗靜設 ê 羅網。16 耶和華已經顯明家己，伊已經行審判；Pháiⁿ 人 hō 家己 ê 手所做 ê 纏 tiòh。[Hi-kai-un, Sè-láh] 17 Pháiⁿ 人 beh 歸 tī 陰府，Boē 記得上帝 ê 列邦亦 beh án-ni。18 因為 sòng-hiong 人的確無永遠 hō 上帝 boē 記得，困苦 ê 人 ê ng 望，的確 boē 永永無去。19 耶和華 ah，求你起來，m̄-thang 容允人 khah 贏；願列邦 tī 你 ê 面前受審判。20 耶和華 ah，求你 hō in 驚惶；願列邦知家己不過是人 nā-tiāⁿ。[Sè-láh]

共同經課 - 3 哥林多後書六章一節~十三節

1 阮 kap 主同 tiòh 磨 ê 亦勸 lín m̄-thang 空空受上帝 ê 恩。2(因為伊講，Tī 得 tiòh 接納 ê 時，我有聽你，Tī 拯救 ê 日我有幫贊你；你看，chit-tiáp 是受接納 ê 時，你看，chit-tiáp 是拯救 ê 日)3 阮一概無塞礙人，免得 chit-ê 職份犯嫌；4 就是凡事證明本身合 tī 做上帝 ê 差用，是 tī choē-choē 吞忍、患難、5 欠缺、困迫、受 phah、關監、擾亂、tiòh 磨、無睏、無食、6 廉潔、知識、寬容、仁慈、聖神 ê 感化、無假 ê 疼、7 真理 ê 道、上帝 ê 權能，用義 ê 戰器 tī 左右，8 無論榮光凌辱，pháiⁿ 名聲好名聲；親像騙人 ê，其實是誠實 ê；9 親像人 m̄ 知，其實 choē-choē 人知；親像 beh 死，其實是活；親像受責罰，其實無致到死；10 親像煩惱，其實常常快樂；親像 sòng-hiong，其實 hō choē-choē 人富；親像無有，其實是無 m̄ 有。11 哥林多人 ah，阮 ng lín 嘴開開，心闊闊。12 m̄ 是 tùi 阮 hō lín 狹 toèh，是 tī lín ê 心家己狹 toèh。13 Taⁿ lín tiòh 學 chit-ê 款，家己開闊來報答阮；我講 án-ni，是親像對家己 ê 細 kiáⁿ 來講。

共同經課 - 4 馬可福音四章三十五節~四十一節

35 Hit 日已經暗，伊 kā 學生講，咱過來去 hit-pêng 岸。36 In 離開眾人，chhoā 耶穌就 án-ni 落船，kap in saⁿ-kap 去；iáu 有別隻船 kap 伊去。37 報頭風大起，湧潑入船，致到船 teh-beh 滿。38 但是伊 tī 船尾倒 tī 枕頭 teh 睏；學生叫伊醒，kā 伊講，先生，阮 beh 無命，你無要緊 mah？39 伊就醒，責備風，kā 海講，Tiòh 靜靜。風就 soah，也大平定。40 伊就 kā in 講，Lín 啥事 hiah 驚？lín iáu-bē 有信 mah？41 In 就大驚，saⁿ-kap 講，chit-ê 是甚麼人，連風 kap 海 lóng 順伊？